

بسم الله الرحمن الرحيم

اللقاء الثاني (سورة التكوير)

القنبلة الذرية في الحرب العالميه الثانيه خلصت في 48 ساعه دي إنشطار الذرات فما بالك بإنشفاق المجرات يبقي فيه نظره تطوريه في الحديث عن الدار الاخره ,, عايز أقول أيه ياأخواتي الكريمات ,, عايز أقول أن لما تلاقوا 3 سور بتتحدث عن موضوع واحد أو عوا تفتكروا إن هو موضوع واحد ده اسمه الإشتباه الموضوعي المواضيع متشابهه والقضيه إننا نعرف إيه الفرق بين السوره والسوره الثانيه

الأعجاز التغييرية لسوره التكوير والسور الي حوليها .

يعني أيه الاعجاز التغييرية ,, يعني السوره دي لو دخلت في حياتك ممكن تغير في حياتك أيه ؟؟ زي سوره مثلا الأعلى لما عاش معها أبو بكر الصديق طلع كل ماله لله فنزل بعدها سوره تمجد في بطوله كل الي طلع ماله لله

سور المرحله السريه عموما والسور الاولي عموما هي الي خلت النبي صلي الله عليه وسلم وقف علي جبل الصفا قدام الدنيا كلها وهتف بكلمه الحق ولم يخشي في الله لومه لائم
المدينه المنوره كان فيها ظاهره في غايه السوء كانت أسوا قريه في الجزيره العربيه بالغش التجاري يعني تخيلوا كده وكانت مشهوره بحاجتين غير ان اليهود متجمعين فيها مشهوره بالحمي والوباء والغش التجاري ,, يعني ربنا ميختارش للنبي غير القريه الي كلها يهود وفيها حمه ووباء كمان وكلها غش تجاري وناس يعني غشاشه في المعاملات التجاريه وكمان قريه مهياش زي مكه البلد المركزيه في الجزيره العربيه كلها عارفين ليه ياخواتنا ؟ عارفين ليه ياأخواني ؟
عشان ربنا يورينا معجزه الدين والأثر التغييرية للدين ونؤمن بطاقات القرآن علي تغيير الواقع .. قد أيه القرآن له أثر أعجازي وتغييرية , لو أحنا نزلنا .. عشان كده اسمه المعهد القرآني الدعوي ليه ؟ لاننا لو إرتباطنا بالقرآن ونزلنا ندعوا بالقرآن هنغير الدنيا كلها هنقلب مسار الدنيا كلها بس أحنا نصبر علي كتاب الله سبحانه وتعالى

يعني المدينه المنوره كده كانت عامله زي ميدان رمسيس حط أيديك علي جيبك وأنت ماشي في الشارع وحط أيديك علي محفظتك وأنت ماشيه في الشارع
سوره المطففين والجزئيه دي نفت الصوره ديفي المدينه المنوره ده بيبهرنا بالقرآن , ده بيبهرنا بالأثر الواقعي والأثر التغييرية للقرآن
يبقي الشوط الثاني بيبث في قلوبنا الثقة في القرآن إنه ممكن يغير قلبك إن الشبهات الي جوا قلبك دي القرآن ممكن يغيرها

الامراض النفسيه الي عندك العجب والكبر والغرور والأنا كل ده ممكن يتغير بالقرآن من أي سرطان نفسي متوغل جوه نفوسنا إن ضعف العزيمه الي عندنا الي مالي حياتنا في العباده والدعوه الي الله إن كل ده ممكن القرآن يغيره بل علي المستوي المجتمعي مين الي يقدر يغير المعاملات الماديه مين الي يقدر يقنع شعب مصر إنه يسبب البنوك الربويه ؟

يبقي سبحان الله العظيم لازم نفهم إن القرآن هو العلاج لتغيير المجتمع الي إحنا عايشين فيه ,, يبقي دي حاجات لازم ناخذ بالنا منها وإحنا بنغير الناس وإحنا شغالين في الدعوه الي الله قد إيه القرآن ممكن يغير الحياه

غير إن الشوط الثاني ده بيتكلم عن الاخره أوعو تنسوا الاثر التغييري للدار الاخره .. أوعو تنسوا الأثر التغييري فى الكلام عن الجنه أوعو تنسوا الاثر التغييري فى السماع عن النار .. أوعوا تنسوا الاثر التغييري الرهيب لتعميق معاني الدار الاخره فى قلوبنا عشان كده لازم نسمع عن الدار الاخره باستمرار هتلاقي تذكر الجنه بيقومك من أعمق نوم إنت نايماه تقومي الليل ليه؟؟ هو ده أثر كلام القرآن عن الدار الاخره

يبقى إحنا دلوقتي مش بنتكلم عن معجزات ماديه حصلت قدام النبي عليه الصلاه والسلام .. مش بنتكلم عن الاعجاز البلاغي فى القرآن أو الاعجاز العلمي ,, إحنا بنتكلم عن إعجاز القرآن فى بناء أعظم حضاره علي الكره الأرضيه , إعجاز القرآن فى إحداث تغيير فى النفس البشريه الي إحنا سمناه قبل كده فى سلسله القرآن غيرني فى رمضان الاعجاز التغييري لكلام الله وللقرآن العظيم وللقرآن المجيد واليوم الاخر إحنا هنتكلم عن اليوم الاخر فى هذه السوره .. الايمان باليوم الاخر ده اصلا من ضمن العقيده ده من ضمن شعب الايمان وده من العقيده الايمان باليوم الاخر يبقى الي احنا بنتكلم فيه ده مش درس تفسير ده درس عقيده الحديث عن الجنه والنار والقبر دي دروس عقيده إحنا بنأسس فيها عقائدنا ياجماعه

طيب بالنسبه لزمان النزول ؟

سوره التكوير ها عايز حد منكم يقولي سوره التكوير هي السوره رقم كام فى ترتيب نزول السور؟؟
أختنا أمينه قالت السابعه مين موافقه علي الكلام ده ومين معترضه علي الكلام ده؟؟
أيه معلوماتكم عن زمن نزول سوره التكوير؟؟
هي السابعه فعلا ...

نزلت بعد سوره الفاتحه ونزلت قبل سوره الاعلي

يبقى الفاتحه نزلت وبعد كده سوره التكوير وبعد كده الاعلي

سوره التكوير من السور الي بنتكلم عن الترهيب والدار الاخره يبقى ده رد علي الي بيقول منتكلمش بالترهيب واخذين بالكم معايا يبقى السور دي هي اول معاني طرقت قلب سميته عشان تضحي بعمرها قدام ابوجهل

لا مش فى المرحله الجهريه أختنا عانده .. أنتوا مش مذاكرين معايا كويس فى سنه اولي السنه الي فاتت ولايه نراجع لكم علي منهج سنه اولي تاني ولايه ياجماعه

المفروض ان الكلام ده واضح بالنسبه لكم جدا إن سوره التكوير من سور المرحله السريه .. من أول عشر سور نزلوا فى كتاب الله والعلماء عدوها السوره السابعه نزلت بعد سوره الفاتحه وقبل سوره الاعلي

لازم نبقي واخذين بالنسبه بالنا من حكمه ترتيب السور اصلا ونفهم السور نزلت أزاي؟؟

يعني مثلا نزل المزل والمدثر وأقرا .. السور الي كلها أوامر يلا أقرأ يلا قم الليل يلا قم فأنذر يبقى سور المجاهده نزلت الاول

وبعد كده نزلت الفاتحه الي هو ايه الموضوع مش بالدراع ده فيه إفتقار الي الله إياك نعبد وإياك نستعين إهدنا الصراط المستقيم معني الإفتقار

بعد كده نزلت السور الي بتكتف الكلام عن الدار الاخره زي سوره التكوير

بعد كده السور الي بتكتف الكلام عن معرفه الله الي هي سوره الاعلي

يبقى شوط فى الكلام عن الله والدار الاخره بعد كده بدئت الثمره تطلع سوره الليل أعطي وإتقي وصدق

بالحسني الناس الي ضحت بكل ماتملك عشان ربنا
بعد كده جت سوره الفجر سوره النفس المطمئنه .. يعني لما ابوبكر طلع كل ماله فى سوره الاعلى ولما
النبي عليه الصلاه والسلام عمل بالدعوه كل ده وهى نفوس مطمئنه بالله ولايهما الكفار ولا بتخاف من
اهل الباطل

طيب دي معلومات مبدئيه كده عن سوره التكوير

آخر حاجه قولناها فى زمن النزول يعني تخيلي ان دي سابع سوره يعني تخيلي كده لما كان المصحف
لسه سبع صفحات لما كان الصحابه قاعدين يصلوا قيام ليل ولسه مفيش غير سبع صفحات بس أو أقل
كمان

طيب نتكلم بقا عن الترابط الموضوعي لسوره التكوير ؟

قولنا انها 12 سوره فوتوغرافيه منتقطين من 50 الف سنه ده تلخيص قرآني ليوم القيامة يعني لعمل
معرض صور عن يوم القيامة يلخص لنا اخطر المشاهد فى 50 الف سنه

السوره التقطت 12 مشهد .. أنتقطت اشد لحظات بيقتشعر لها البدن ويشيب لها شعر الراس واولها
الشمس **إِذَا الشَّمْسُ كُوِّرَتْ** " علي فكره ياجماعه الشمس مذكرتش فى آيات يوم القيامة الا مرتين
يعني الجبال ذكرت كتير انما الشمس ذكرت مرتين بس واولها إذا الشمس كورت ,, أولها كده بدايه
القصة إن الشمس دي هتختفي من المشهد تماما تماما

دلوقتي سوره التكوير نصفين النصف الاول الي هي مشاهد يوم القيامة والنصف الثاني بيتكلم عن
الخنس الجوار الكنس والكون الجميل ..

طيب إيه الترابط بقا ؟ إيه الترابط بين النصف الاول والثاني ؟
طيب إيه الترابط الاول بين النصف الاول اصلا ؟

إيه الترابط بين النصف الاول و الثاني؟ النصف الاول بيتكلم عن الكون وهو منقلب والنصف الثاني بيتكلم
عن الكون الجميل الكون البديع الكون العظيم
كأن الحقوا قبل ماينتقلب الكون إستثمروا وتدبروا فى الكون البديع الجميل ده تدبروا فى هذا الكون
الرائع

طبعا السور العشره الاولى فى القرآن الي فى المرحله السريه تكلّموا عن التدبر فى خلق الله كلام عظيم
جدا تكلّموا عن التدبر فى خلق الله كلام رائع بحيث ان انتوا حد منكم يمك بحث عن التدبر فى خلق الله
من سور المرحله السريه من اول 10 سور نزلوا فى القرآن فى المرحله السريه
إن الناس تأخذ النقطه دي قد إيه التدبر فى الخلق كان بيمثل معاني تأسيسيه للايمان وللدين فى بدايه
الدعوه

طيب إيه الرابط بين 12 مشهد دول بقا ؟

الرابط بين 12 مشهد هو عذاب الرعب يوم القيامة

الشمس كورت .. ده تجهيز مسرح الاحداث الي هيقوم عليه الانسان من تحت التراب

طبعا انتوا عارفين ان العلماء مختلفين هذه المشاهد بتحصل فى نهايه الدنيا فى اول يوم القيامة ولا هذه
المشاهد بتحصل فى بدايه يوم القيامة

يعني من الاخر المشاهد دي مع نفخه الفرع " أنتوا عارفين ان فيه ثلاث نفخات نفخه الفرع الي هي يوم
القيامة بيقوم والدنيا بتتقلب والناس بتفرع

بعد كده نفخه الصعق **"فَصَعِقَ مَنْ فِي السَّمَاوَاتِ وَمَنْ فِي الْأَرْضِ إِلَّا مَنْ شَاءَ اللَّهُ"** الزمر:68. الي هي

الكون كله بيموت

بعد كده نفخه البعث الي هي " **ثُمَّ نُفِخَ فِيهِ أُخْرَىٰ فَإِذَا هُمْ قِيَامٌ يَنْظُرُونَ** " الزمر: 68 الكون كله بيقوم العلماء مختلفين المشاهد دي مع نفخه الفرع الي هي اخر الدنيا المشهد الي الناس بتموت عليه ولا مع نفخه البعث الي هي بدايه القيامه المشهد الي الناس بتصحي عليه

وأي كان الموضوع فالناس هتموت علي مشاهد مفزعه وهتصحي علي مشاهد مفزعه والقول الي احنا مركزين عليه ان دي بدايه ..ف ناس بتؤمن لا طبعا ان هذه المشاهد خلاص معدش فيه ايمان هنا اصلا القصة انتهت ده يوم القيامه " **يَوْمَ يَأْتِي بَعْضُ آيَاتِ رَبِّكَ لَا يَنْفَعُ نَفْسًا إِيْمَانُهَا لَمْ تَكُنْ أَمَنَتْ مِنْ قَبْلُ أَوْ كَسَبَتْ فِي إِيْمَانِهَا خَيْرًا** " الانعام: 158 يبقي القول الي انا بالنسبه لي ماشي عليه ان دي بدايه يوم القيامه وان كان فيه مشاهد سيحدث منها الكثير جدا في نهايه الدنيا يبقي الرابط مابينهم هو عذاب ايه ؟ عذاب الرعب .. الانسان هيبعث من تحت التراب علي المشاهد دي قالوا بقا واحد صحي الساعه 2 بالليل لقي المكان كله ظلّمه وتخيّلوا حوليه اصوات رهيبه بقا من الفرع والرعب والوحوش محشوره فتخيّلوا ان اول حاجه بيبعث عليها الظلام التام بعد كده إذا النجوم إنكدرت .. الإنكدار ده له معاني من معانيه هجوم النجوم علي الارض وهجوم الكواكب علي الارض

من ضمنها الكدره وتغير اللون .. السماا هتسود تماما وهتغميم تماما من ضمنها الانطفاء معدش فيه معالم فوق ولا تحت يبقي ده ايه مشهد رعب

يبقي النجوم لما تنكدر معدش عارف فوق من تحت ولا ليل من نهار تكوير الشمس معدش حد عارف ليل من نهار معدش فيه قمر اصلا لان القمر بياخذ نوره من نور الشمس

يبقي لما النجوم تنكدر معدش فيه معالم اصلا .. معدش غير هجومها علي الارض

بعد كده إذا الجبال سيرت .. الجبال بتحمي الارض من 3 مظاهر مرعبه ,, بتحمي الارض من الزلازل المرعبه لانها بتتبب الارض وبتحمي الارض من البراكين المرعبه لان هي قافلّه الفوهات المفتوحه في القشره الارضيه الي تحتها علي طول حمم بركانيه فلو اتشالت الجبال البراكين تطلع ,, وبتحمي الارض من الرياح المرعبه نتيجة فارق درجه الحراره الرهيب مابين القطبين الشمالي والجنوبي وخط الاستواء الناري فبيحصل رياح مرعبه الي بيصد الرياح دي عن البشر هي سلاسل الجبال الموجوده يبقي دي الثلاث وظائف للجبال :

1- بتحمي الارض من الزلازل يعني لما الجبال تسير هيجصل زلازل

2- بتحمي الارض من البراكين البراكين هتغلي علي الناس

3- وبتحمي الارض من الرياح الجباره لان العلماء لما قاسوا درجه الحراره بين القطب الشمالي وخط

الاستواء لقوا الفرق 100 درجه فقالوا لولا السلاسل الجبلية الي عليه الارض والتنوع الجغرافي في الارض ان هي طالعه ف حته ونازله في حته كانت الرياح دي بسرعات تنسف كل الي يقابلها في الطريق يبقي إذا ظلام مرعب ,, أصوات مرعبه ,, مفيش معالم ,, رياح مدمره ,, وبراكين مرعبه ,, زلازل مدمره يعني سبحان الله العظيم كل ده مع صراخ العصاه الي هما طالعين من تحت التراب

يعني الجنين وهو خارج من بطن الام بيخرج خايف ومرعوب وببسميها علماء النفس صدمه الميلاد أmaal بقا الي طالع من عالم لعالم

وإذا العشار عطلت والوحوش حشرت المعنيين دول بيكملوا بعض لان العشار عكس الوحوش .. العشار

من العشره والانس والونس والوحوش من الوحشه
فالعشار عطلت بعض المفسرين قال العشار من العشره يعني جميع العلاقات البشريه والعشائر والعشره
بين الزوج والزوجه والاصحاب والاناثيم والي بيحب واحده والي بتحب واحد والام وولادها كل العلاقات
البشريه بتنهار ,, إذا العشار عطلت كل العلاقات البشريه بتنهار !

فمعني مرعب إيه الي يخلي العلاقات البشريه تنهار .. إيه الي يخلي عواطف البشريه تنهار ؟
بعد كده إذا الوحوش حشرت يعني الاسود والفهود والنمور شايفه العشار لان العشار برده الي هي الابل
الحوامل فى الشهر العاشر وشايفه بني ادمين ومبتقربش منهم ليه ؟؟ لان هي نفسها دمها محبوس هي
نفسها مرعوبه

تخلي نفسك كده صحيتي لقيتي نفسك فى قفص اسود والاسود بتزمرجر حواليك وبعد كده فوجئت ان
الاسود نفسها مرعوبه !! طيب أنت بقا تخيلي حالتك هتبقى أيه فى هذا الوقت وفى هذه اللحظه
وَإِذَا الْبِحَارُ سُجِّرَتْ .. الميه بقت نار 81 فى الميه من مساحه الكره الارضيه ميه تخيلوا بقا كده لما
البحار دي كلها كانها بنزين وولع يبقي المنظر ايه ؟

عَلِمَتْ نَفْسٌ مَّا أَحْضَرَتْ التركيز علي لفظ النفس هنا ليه ؟ لان القلب هو محل المشاعر إنما النفس
هي محل الرغبه .. هي احلام اليقظه بقا والشباب الي بيحلم يمشي مع بنات والبنات الي بتحلم تمشي
كاسيه عاريه والشباب ينبهر بيها كل دي النفس الي نفسه يطلع مغني مشهور والي نفسها مش عارف
ايه ؟ والي نفسه يعلو والانا بتاعته تزداد

النفس دي هي الي دمرت الانسان اصلا هي الي عملت جدران بينه وبين ربنا أنا نفسي فى كذا ؟ أنا بحلم
بكذا !

أحلام اليقظه جي لما الانسان يغمض عينيه كل دي هي النفس
عَلِمَتْ نَفْسٌ مَّا أَحْضَرَتْ يعني النفوس الي كانت حاجز بينك وبين ربنا سبحانه وتعالى فى اللحظه دي
هتفوق علي الحقيقه المره

طبعا كلها مشاهد الرابط بينها زي ماقلنا ف الترابط الموضوعي الرعب ..
أختنا هبه القران بتقول هو كل الناس بتشوف هذه المشاهد ؟

فى نفخه البعث الناس كلها بتشوفها لو قولنا ان الكلام ده فى نفخه الفرع يعني فى نهايه الدنيا يبقي 99
فى الميه من البشريه مش هيشوفها اصلا ولا هيشوف المشاهد دي ولا هيعرف عنها حاجه
إنما البشريه هتشوف كل المشاهد دي فده بيدل علي ان هذه المشاهد الي الناس هتستيقظ عليها فى
البعث ,,

وَإِذَا النُّفُوسُ رُوجَتْ .. إيه الرعب فى كده ..
الرعب ان الواحد يصحي يلاقي نفسه وسط صحبه من الزناه او القتل او فده معناه ايه بقا ؟ معناه ان
مصيره زيهم يعني سبحانه الله العظيم

وَإِذَا الْمَوْؤُودَةُ سُئِلَتْ بِأَيِّ ذَنْبٍ قُتِلَتْ .. بنت عندها يومين ادفنت أبوها وأدها لما دي بقا تسأل قبل
مالناس كلها تسأل يعني تخيلوا كده لما نبدا العرض علي الله والموده تسأل واهل الحشر كلهم واقفين ,,
إذا كان العدل وصل لهذه الدرجه إمال الكبار هيتسألوا قد ايه وهيتعمل فيهم ايه .. إذا كان العدل وصل
لهذه الدرجه ان الي عمرها ساعات يتعمل لها محاكمه مخصوصه من أجلها يوم القيامه
أمال بقا الي ظلموا المتدينين والي ظلموا أهل الدين !!

وَإِذَا الصُّحُفُ نُشِرَتْ وَإِذَا السَّمَاءُ كُشِطَتْ .. الناس بيتها لياها ان السماء دي هي الحاجه الي فوق لما

السماء تتشال بقا ويظهر مافوقها من عرش الملك وملائكه السموات السبعه وجلال الله فى الكون تخيلوا ياخوانا

وَإِذَا الْجَحِيمُ سُعِّرَتْ.. الحيوان المسعور ده دايمًا بيبقي كلمه مرعبه يعنى التسعير جنب كلمه الجحيم الكلمتين يرعبوا اصلا ,, الجحيم سعرت .. يعنى هي جحيم وكمان سعرت سبحان الله العظيم كل ده بقا إذا إذا يعنى ليه ربنا مقالش إذا الشمس كورت والنجوم إنكدرت والجبال سيرت العلماء قالك كأن كل مشهد من دول عالم لوحده .. غير ان المشاهد دي ياجماعه مش بتحصل كلها مع بعض فيه مشاهد منها ساعه البعث ومشاهد منها ساعه الحشر ومشاهد منها ساعه العرض .. يعنى المشاهد دي بينها وبين بعضها الاف السنين أصلا فكل مشهد فصل ب إذا إذا .. ده أطول شوط فى شروط إذا القرآن 12 مره ورا بعض فده بيدل على التنوع الرهيب فى مشاهد الرعب يوم القيامة فى النهايه بقا وإذا الجنه أزلفت .. منظر اللهفه بقا على الجنه وهي بتقرب بقا يعنى تخيلي كده واحد وهو فى وسط مشاهد الرعب دي لو شاف بس كولدير ميه ساقعه هيقع من طوله اصلا طيب لو شاف بقا اوبن بوفيه طيب لو شاف الجنه بقا !!

عَلِمَتْ نَفْسٌ مَّا أَحْضَرَتْ.. الإعتراض بقا على ثوابت الدين والحجاب ,, الي بيعترضوا دلوقتي على حكم المعازف وعلى حكم الحجاب والفيس بقا مليون والنت بقا مليون وتريقه ومش لازم عشان ترضي ربنا انك تتحجبي وانت روعه مش عوره والكلام وكل ده ساعتها هيعرف بالظبط ايه الي كان صح وإيه الي كان غلط !!

وليه لفظ نفس بقا ياخوانا قولنا السبب الي بيجادلوا اصلا مش الجهل ده سببها النفس علمت نفس لان هوي النفس هو الي كان بيلاقي ان الدعوه الي الله عكس هواها فكانت النفس بتهرب انها تواجه نفسها ان هو ده مراد ربنا سبحانه وتعالى ..

وده برده بي فهمنا درس خطير فى فن الدعوه ان الدعوه الذكيه الي مبتقمش على الامر والنهي فى الاول إنما بتقوم على مداخل القلوب الاربعه لو انتوا عارفين مداخل القلوب الاربعه الي هي (معرفه الله _ الاثر الدنيوي للطاعه والمعصيه – هم الدين – هم الاخره)

هي دي المداخل الاربعه للقلوب الي نكلم الناس الاول قلبها يتفتح نبدا بقا نكلمها ايه فى الامر والنهي .. لما بيجيلي شاب بيقولي حكم الذن ايه ؟ أقصر بنطلوني ولا اعمل ايه ؟ أنا عارف أن الشيطان بيحيى للملتزم الجديد والملتزمه الجديده ويبدأ يوسوس لهم فى بعض الاحكام الي صعبه عليهم فى المرحله دي عشان ميقدروش يجلم احباط ينتكسوا

بقولهم لا المثل الي بقوله دايمًا فى المرحله دي زي الي واقف فى مسجد ظلّمه يجي شويه نور يشوف المنبر النور يزيد يشوف العواميد النور يزيد يشوف السجاد يفضل النور يزيد لحد مايشوف الذبانه الطايره فى الهوا فيقوله يا حبيب قلبي ركز ان النور يجي وبعد كده انت هتشفو كل حاجه بنفسك طيب برده علمت نفس ماأحضرت .. ليه كلمه نفس هنا ؟

التربيه النفسيه ياجماعه يعنى إحنا قاعدين نطلع فوائد تربويه ومقاصد تربويه من كلمه نفس بس ليه كلمه نفس !؟

ليه كلمه نفس تذكر هنا لانها كانت الجدار الي بينك وبين ربنا برده عشان موضوع التربيه النفسيه عشان ترابط الشوط ده اصلا بيتكلم عن تغيير مجري النفس

وَفِي ذَلِكَ فَلْيَتَنَافَسِ الْمُتَنَافِسُونَ.. النفوس بتتنافس على الدنيا ربنا بيقول لاتنافسوا على الاخره تنافسوا على الرحيق المختوم مش على رحيق الدنيا الزائل زهره الحياه الدنيا لنفتهم فيه

برده كلمه نفس عشان مسأله التربيه النفسيه من أخطر أنواع التربيه الملتمزمين والملتمزمات مركزين علي التربيه القلبيه الي هي أيه بقا ؟ أزاي أحس بنعم ربنا .. أزاي أحب ربنا .. أزاي أخاف من ربنا إنما فيه حاجه أسمها التربيه النفسيه . أزاي أتخلص من الاهواء أزاي أتخلص من الأنا من حب المركز من حب الشهره من حب الموقع أزاي

برده كلمه نفس جاءت نكره عشان إحساس الانسان بمدي حقارته ووضاعته بعد ماعصي ربنا يوم القيامه والله أعلم

كلمه نفس جاءت بالإفراد .. كل واحد هيلقي نفسه يوم القيامه لوحد

وَلَا يَسْأَلُ حَمِيمٌ حَمِيمًا (10) المعارج.. محدش هيبص لحد

ربنا قال بعدها **يُبَصِّرُونَهُمْ**.. الملائكه هتقوله شايف حبايبك بيتعذبوا اهو حبايبك الي كانوا بيعصوا ربنا وبتعصي ربنا معاهم بيتعذبوا أهو ويعمل ولا كأنه داري ولا كأنه شايفه

عَلِمَتْ نَفْسٌ مَّا أَحْضَرَتْ.. طبعا كلمه ماأحضرت بتقول لكل واحد مننا حضرتي أيه يوم القيامه ؟ الواحد لما بيكون مسافر بيحضر للسفر ,, عندك إمتحانات بتحضري للامتحان ,, لو أنا عندي خطبه جمعه هحضر للخطبه .. طيب حضرنا إيه ل 50 ألف سنه !

إذا لو كنا رايعين نتفصح فى بلد بنحضر 10 ايام قبلها .. أمال الي إدفن 50 الف سنه يوم القيامه و7 الاف سنه تحت التراب يبقى يوم القيامه ده فيه مواقف رهيبه محتاجه تحضير رهيب رهيب ياأخواني فى الله

الإشتباه الموضوعي فى السوره ..

يعني إيه الإشتباه الموضوعي .. زي ماتكلنا فى حته إيه النبره التصاعديه فى الايات إن سوره التكوير الاعلي فى التصاعد والاعلي الانفطار والاعلي الإنشقاق يعني كأن إيه خذوا الناس واحده واحده وأعلوا بالناس واحده واحده تدرجوا فى تعليه الناس الناس مش هتطلع السلم مره واحده زائد ان لازم الشحن بتاع النهارده بيبقى أقوي من الشحن بتاع امبارح إخلاص أمبارح محدش يكفيك إنك تمشي النهارده خلاص بعد ما بدنتي تطلبي علم .. أنت فى الاول كان كل تدينك بتصلي , كان كل تدينك بتلبسي حجاب أمهات المؤمنين فكنتي عايزه قدر إخلاص معين دلوقتي بقيتي شغاله فى طلب العلم بقيتي عايزه اخلاص اعلي لان العلم عايز درجه عاليه من الاخلاص , بقيتي شغاله فى الدعوه عايزه اخلاص اعلي فاحنا محتاجين دايمنا نعلي فى الشحن يعني مش معني أن التزامك يزيد او تقدمي فى الالتزام بيبقى معناها انك لازم تسمع دروس اقل أو تبطل تسمع دروس دا انت محتاج تسمع اكثر ومحتاج تتشحن اكثر برده من الإشتباه الموضوعي فى السوره اننا بنلاقي ايات يوم القيامه فى القران كتير وكثير منها بيتكلم عن القيامه ,, ايات الجنه كتير وكثير منها بيتكلم عن الحور وعن الجنات .. ايات النار كتير وبتتكلم عن الجحيم وعن السعير

أوعوا تظنوا ياجماعة ان آيات القيامه واحده وايات الجنه لانها متشابهه فى الالفاظ إنها بتتكلم عن حاجه واحده أو آيات النار .. كل مره فيه جديد , أمال ليه كل مره فيه الفاظ بتتكرر ؟ لان ماتكرر تقرر لان كل مره فيه معاني جديده سواء فى آيات القيامه او الجنه او النار يعني مثلا لو مسكنا آيات الجنه .. آيات الجنه فى سوره الطور بتتكلم عن أيه ؟ الحياه الاجتماعيه فى الجنه

طيب فى سوره الإنسان ؟ الرفاهيه بقا جنه وحريرا لبس بنات الملوك
طيب فى سوره الرحمن ؟ الفروق الرهيبه بين درجات الجنه وبعض

طيب فى سورة الزخرف ؟ بتتكلم عن اول يوم فى الجنه فى البدايه فرحه اول خطوه فى الجنه , فرحه اول قطمه فاكهه فى الجنه , فرحه اول عزومه واول سكن للقصور بتاعتنا فى الجنه بإذن الله يارب اللهم أرزقنا الفردوس الاعلى بغير عقاب ولاعذاب

طيب سورة يس ؟ سورة يس مش بتتكلم عن الجنه " إن أصحاب الجنه اليوم فى شغل فكهون " ده ربنا بيتكلم عن أهل النار وبيبكتهم فبيكلمهم وبيقولهم شوفوا أهل الجنه بيتنعموا قد ايه ؟ طيب فى سورة النبأ ؟ قواعد أترابا .. بتتكلم عن النعيم المادي ليه ؟ بتكلم شباب كل يوم يقع فى الزنا بتقوله نفس الشهوات الي انت بتعملها دي موجوده فى الجنه ولكن أعظم منها وبدون معصيه ربنا ومعصيه ربنا هتحرملك منها

يبقى ده إضاءه علي الإشتباه الموضوعي فى السوره .. يبقى مش معني إن السوره بتتكلم عن يوم القيامة يبقى نفس الكلام الي اتقال فى السور التانيه لا كل سوره فيها إضافه زي ماقولنا هنا عذاب الرعب ومشهد الرعب رابط كبير فى هذه السوره يميزها عن كثير من السور الي بتتكلم عن يوم القيامة
إضاءات علي الشرح ... إضاءات علي شرح السوره ..

هل ندخل دلوقتي فى شرح السوره ولا كفايه علينا كده النهارده وندخل بقا فى ماده الدعوه عملي ؟ أنتوا شكلوكوا تعبانين النهارده عشان كده أنا هوقف هنا بقا والمره الجايه بإذن الله تبقى إضاءات علي شرح السوره نكمل بقا شرح السوره وندخل فى النصف الثاني من السوره
إن شاء الله هديكم راحه 5 دقائق ودفعه تانيه ودفعه ثالثه هلنتقي بيهم مع بعض بإذن الله فى ماده دعوه عملي عشان النهارده عايز اشوف بقا اتابعكم واشوف مشاكلكم ايه ؟ وبرنامجكم فى عشر ذي الحجه ايه ؟ لو عندكم مشاكل فى الدعوه الي الله ايه مشاكلكم لان فيه مشاكل تكررت من الكثير منكم ممكن نتناقش فيها بإذن الله سبحانه وتعالى

أنا قولتلكم المره الي فاتت ان عايز اعمل فريق لدعم التواصل مع التحضير الواقعي قولتلكم هذا الكلام وفيه منكم مجموعه قدمت ..يعني أنا مثلا عايز اكون فريق لان انا بسمع اخبار فعلا الواحد بيحس ان شعر راسه هيقف منها من جراه بنات علي ثوابت الدين وناس بتعمل حاجات غريبه وبرامج التوك شو يعني كل شويه يطلع حرب رهيبه علي ثوابت الدين وجراه رهيبه من البنات انا بسمع عن جروبات بنات فيها حاجات غريبه جدا وتصورات غريبه كذلك الواحد بيسمع اخبار مستفزه حتي فى مجال الفن ومجال الرياضه فانا فكرت اعمل فريق يساعدني فى التواصل مع الواقع أعرف أخبار الواقع ايه ؟ أتئين مثلا يمسكولي تلخيص برامج التوك شو الاساسيه الثلاث برامج الاساسيه مثلا او الاربع برامج الاساسيه يجيبوا ملخصها ويقولولي اتكلمت عن ايه وملخصها ايه ؟
ايه أخر أخبار البنات بنات ثانوي واعدادي وجامعه والنوازل بقا بتاعه المعاصي الي بدنت تظهر جديده وسط البنات وعشان لما نيجي نكلمهم فى موضوع المرأه حد مثلا يكون بيتابع لي أخبار العلمانيين بيقولوا ايه وبيعملوا ايه ؟

حد يجيب اخر الهشتاجات واقوي الهشتاجات الموجوده وايه الي المجتمع بيتكلم عنه دلوقت بيسموه حديث المدينه يعني بحيث ان احنا نشوف ازاي نوصل الدين للناس من خلال احداث الواقع وده منهج القران اصلا بيستثمر أحداث الواقع يعني مثلا سورة الروم حرب عالميه جديده يقوم ينزل سورة الروم فكل اهل مكه هيتجننوا طبعاً عايزين يعرفوا التعليق القراني علي الاحداث ايه ؟ الناس مشغوله لما يكون فيه حجه المجتمع بيتكلم عنها عايزين يشوفوا مين هيعلق فلما نجيب تعليقات القران والسنه هتبقى

حاجه قويه ، حد بس ده طبعا يكون كبير متزوج ومخلف حد يتابع لي اخبار الرياضه والفن لان احيانا بيبقي حاجات مستفزه افلام وحرب علي الدين مثلا وافلام حرب علي الالتزام هتتعمل جديده بيبقي فيه حاجات مستفزه

فيه حاجات فى الرياضه فى الاخبار الرياضيه بتبقي مستفزه جدا أزاي الناس وصلت للدرجه دي؟! بحيث ان احنا نتواصل معها .. الي منكم باذن الله سبحانه وتعالى مستعده انها تبقي ممعايا فى هذا الفريق التحضير الواقعي والتواصل مع ملفات الواقع تقدم لاختنا زوجه الشيخ احمد طاهر مدير المعهد يعني فيه شويه من الاخوات قدموا لها واحنا لسه هنختار منهم باذن الله ، الي عايزه منكم تقدم فى هذا الفريق ان شاء الله تمسك مهمه تكون بسيطه كده نشوف نشره اخبار الواقع شكلها ايه ؟ بحيث واحنا بنتكلم فى الدعوه احنا بنتكلم واحنا فاهمين الي بيحصل فى الواقع زي سلسله مولانا كده اللهم لك الحمد كنت ادخل السوبر ماركت ادخل اي حته امشي فى الشارع القى الناس متفاعله معاه ليه لانها كانت قضيه الناس تعبانه بسببها شبهات من اهل الفن ضد الدين وضد العقيدة لما اترد عليها كان ليها اثر كبير جدا انه انقلب السحر علي الساحر وفي نشر الالتزام بفضل ومنه الله بين شباب وبنات كتير جدا فده فكرتها ان احنا نجيب احداث الواقعإن شاء الله باذن الله المتحمسه تدخل ممعايا فى هذا الفريق ان شاء الله ويبقي فيه متابعه معاهم ان شاء الله تقدم لزوجه الشيخ احمد طاهر اقول قولى هذا واستغفر الله العظيم لي ولكم سبحانك الله وبحمدك اشهد ان لا اله الا انت استغفرك واتوب اليك ..